



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁL**

*Sumariu kazu 2014*  
*Tribunál Distritál Baucau*  
*Jullu 2014*

**Sumáriu prosesu julgamentu kazu iha Tribunál Distritál Baucau  
periúdu Jullu 2014**

***Introdusaun***

Iha Jullu 2014, JSMP kontinua hala'o atividade monitorizasaun ba prosesu julgamentu kazu iha Tribunál Distritál Baucau no konsege rejista kazu krime hamutuk 42 hosi total kazu 50 ne'ebé Tribunál Distritál Baucau julga. Kazu sira ne'e inklui kazu ne'ebé JSMP rejista liuhosi julgamentu móvel iha Distritu Viqueque.

Kazu 42 ne'e kompostu husi kazu krime ho natureza violénsia doméstika hamutuk 30 (ofensa ba integridade fízika simples 27, tentativa omisídiu 1, omisídiu agravadu 1 no mastratus ba kónjuje 1). Enkuantu krime sira seluk mak ofensa ba integridade fízika simples 6, ofensa ba integridade fízika simples no danu simples 1, abuzu poder no pekulatu 1, omisídiu agravadu 1, krime partisipasaun iha motin 1, explorasaun ba jogu ilícitu 1 no krime ameasa 1.

Hosi kazu 42 ne'e, iha kazu 21 mak tribunál konklui ona nia prosesu no restu sei kontinua prosesu iha faze produzaun prova, alegasaun finál no balun tama ona ba leitura sentensa.

Tuir mai deskripsaun sumáriu julgamentu kazu kompostu :

**1. Kazu krime ofensa ba integridade fízika simples - Nuc. : 0009/14.PDBAU**

Kompozisaun Tribunál : Singulár  
Juis : Dr. Hugo da Cruz Pui  
Ministériu Públiku : Dr. Aderito Tilman  
Defeza : Dr. Americo Luis Freitas Belo (advogadu  
estajiariu)  
Konkluzaan : Adia

Iha 08 Jullu 2014, Tribunál Distritál Baucau adia prosesu kazu ofensa ba integridade fízika simples ne'ebé involve arguidu FdS hasoru DS, iha 27 Novembru 2013 iha Suku Aiteas, Distritu Manatuto.

Julgamentu ne'e adia tanba arguidu no lezadu la kumpri notifikasaun hosi tribunál. Tanba ne'e, tribunál marka fali julgamentu ba iha 27 Outubru 2014.

**2. Kazu krime ofensa ba integridade fízika simples ho natureza violénsia doméstika - Nuc. 0390/13.PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Luis Hernani Rangel da Cruz  
Defeza : Dr. Jonas Henrique da Costa  
Konkluzau : Adia

Iha 08 Jullu 2014, Tribunál Distritál Baucau adia prosesu julgamentu ba kazu krime ofensa ba integridade fízika simples ne'ebé involve arguidu TdS hasoru feen, iha 04 Setembru 2013, iha Laklubar, Distritu Manatuto.

Prosesu julgamentu ne'e adia tanba arguidu no lezada la marka prezensa maske hetan ona notifikasaun hosi tribunál. Tribunál seidauk determina lonon hodi hala'o prosesu julgamentu ba kazu ne'e.

**3. Kazu krime ofensa ba integridade fízika simples ho natureza violénsia doméstika - Nuc. 0093/12.PDBAU**

Kompozisaun Tribunál : Singulár  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Jonas Henrique da Costa  
Konkluzau : Adia

Iha 08 Jullu 2014, Tribunál Distritál Baucau adia prosesu julgamentu ba kazu krime ofensa ba integridade fízika simples ne'ebé involve arguidu MSRS hasoru nia feen, iha 12 Fevereiro 2012 iha Laklo, Distritu Manatuto.

Kazu ne'e mós adia tanba arguidu no lezada la marka prezensa iha tribunál maske hetan ona notifikasaun no tribunál seidauk determina orariu ba julgamentu foun.

**4. Kazu krime ofensa ba integridade fízika simples ho natureza violénsia doméstika - Nuc. 0467/12.PDBAU**

Kompozisaun Tribunál : Singulár  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Americo Luis Freitas Belo  
Konkluzau : Sei kontinua prosesu

Iha 08 Jullu 2014, Tribunál Distritál Baucau julga arguidu MdS ne'ebé komete krime ofensa ba integridade física simples hasoru ZX nu'udar arguidu nia fen. Kazu ne'e akontese iha 28 Setembru 2012 iha Quelicai, Distritu Baucau.

Ministériu Públiku akuza katak iha 28 Setembru 2012, maizumenus iha oras tuku 09:00 dader, arguidu ho ai baku dala ida iha lezada nia kabas no kontinua ho ai baku lezada dala hát iha lezada nia ulun fatuk. Kazu ne'e akontese tanba lezada tuda osan US\$100,00 ba arguidu wainhira arguidu husu osan atu ba joga karta.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 3, 35 (b) Lei Violensia Domestika.

Iha audiensia julgamentu arguida konfesa no rekoñese ninia hahalok ne'ebé nia komete hasoru lezada.

Iha alegasaun finál, ministériu públiku husu ba tribunál atu aplika pena admoestasaun ba arguidu. Alende ne'e, defeza mós husu ba tribunál atu aplika pena admoestasaun tanba arguidu foin primeira-ves komete krime ne'e hasoru lezada.

Depois rona tiha alegasaun, tribunál marka fila fali prosesu julgamentu ba iha 23 Jullu 2014, tuku 11:00 dader ho agenda desizaun finál.

#### **5. Kazu krime tentativa omisídiu ho natureza violénsia doméstika - Nuc. 0057/13.PDBAU**

Kompozisaun Tribunál	: Koletivu
Juis	: Dr. Afonso Carmona, Dr. Jose Goncalves, Dr. Hugo da Cruz Pui
Ministériu Públiku	: Dr. Aderito Tilman
Defeza	: Dr. Grigorio de Lima
Konkluzau	: Kondena ho pena prizaun tinan 5

Iha 08 Jullu 2014, Tribunál Distritál Baucau hala'o prosesu julgamentu ba arguidu AdCM ne'ebé akuzadu involve iha krime tentativa omisídiu hasoru nia feen. Kazu ne'e akontese iha 29 Novembru 2012 iha Baguia, Distritu Baucau.

Ministériu Públiku akuza katak iha 29 Novembru 2012, maizumenus iha tuku 18:00, lezada diskuti malu ho nia banin fetu tanba laiha hahan. Depois diskuti malu lezada hamutuk ho nia oan na'in rua halai ba iha nia inan aman sira. Arguidu tuir kedas lezada ba iha nia inan aman no baku ho katana nia belar dala rua iha lezada nia kotuk laran. Iha momentu ne'ebá lezada tenta halai maibé arguidu duni tuir no taa dala ida iha lezada nia kanuruk. Aktu ne'e resulta lezada hetan kanek iha kanuruk, sofre tilun diuk nomós nakdedar wainhira kaolia.

Ministériu Públiku akuza arguidu kontra artigu 138 Kódigu Pénal kona-ba omisídiu simples no artigu 23 Kódigu Pénal kona-ba tentativa konjuga ho artigu 35 Lei Kontra Violénsia Doméstika.

Iha produsaun ba provas, arguidu deklara katak nia la baku iha lezada nia kotuk laran maibé baku iha ain kabun dala rua. Arguidu mós deklara katak kanek iha kakorok tanba sira hadau malu katana nune'e katana kona iha lezada nia kanuruk. Aleinde ne'e, arguidu mós deklara katak nia la duni lezada hodi taa lezada.

Iha parte seluk, lezada deklara katak iha momentu ne'ebá, nia ba halo tuir adat iha nia inan aman sira nia uma. Iha tempu hanesan, lezada ko'us hela sira nia oan no ku'u hela ainanas, derepente arguidu ho katana nia belar baku dala rua iha nia kotuk laran. Tanba ne'e lezada halai no arguidu duni tuir no taa dala ida iha nia kanuruk. Depoisode akontesimentu ne'e, lezada deklara katak nia la bele tutur sasan todan ona. Agora daudaun sira hela ketaketak/separadu ona.

Testamuña MB depoimenta katak nia hare hosi distansia metru 7, arguidu ho katana nia belar baku dala rua iha lezada nia kidan no hare lezada halai maibé arguidu duni tuir no taa iha lezada nia kanuruk.

Iha alegasaun finál, ministériu públiku husu ba tribunál atu kondena arguidu ho pena prizaun tinan 5 tanba konsidera faktus provadu sira hanesan baku lezada dala rua (2) ho katana no taa dala ida (1) iha lezada nia kanuruk. Entretantu parte defeza husu tribunál atu aplika pena adekua tanba arguidu laiha intensaun atu taa lezada.

Iha 30 Jullu 2014, tribunál kondena arguidu ho pena prizaun tinan 5 no selu kustus judisiál US\$30,00, tanba tribunál prova katak arguidu komete duni krime tentativa omisídiu hasoru lezada

## **6. Kazu krime ofensa ba integridade fízika simples ho natureza violénsia doméstika - Nuc. 0571/12.PDBAU**

Kompozisaun Tribunál	: Singulár
Juis	: Dr. Afonso Carmona
Ministériu Públiku	: Dr. Pascasio de Rosa Alves
Defeza	: Dr. Horta Ramos
Konkluzaan	: Kondena pena multa US\$ 45.00

Iha 09 Jullu 2014, Tribunál Distritál Baucau hala'o julgamentu ba arguidu LS ne'ebé akuzadu ba krime ofensa ba integridade fízika simples hasoru CM nu'udar nia fen. Kazu ne'e akontese iha 21 Novembru 2011, iha Distritu Viqueque.

Ministériu Públiku akuza katak iha 21 Novembru 2011, maizumenus iha oras tuku 07:00 dader, arguidu foti ai bebak ida baku dala tolu iha lezada nia kelen to'o lezada monu tun ba

rai hodi rezulta lezada nia liman hetan kanek kois/ki'ik. Kazu ne'e akontese tanba arguidu no lezada diskuti malu kona-ba arguidu ne'ebé hakarak empresta osan ba ema seluk maske antes ne'e impresta ona US\$100.00 no seidauk selu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha prosesu julgamentu arguidu konfesa no rekoñese ninia hahalok hasoru lezada. Arguidu mós deklara katak nia arrende no agora dadaun sira diak malu ona.

Iha alegasaun finál ministériu públiku husu ba tribunál atu aplika pena prizaun fulan 3 no suspende ba tinan 1, tanba durante julgamentu arguidu konfensa faktu sira hotu.

Entretantu defeza husu ba tribunál atu aplika pena admoestasaun ba arguidu tanba arguidu foin primeira-ves komete krime ne'e duni defeza.

Iha 24 Jullu 2014, tribunál konklui prosesu kazu ne'e no kondena arguidu ho pena multa US\$45,00 ne'ebé kada loron arguidu selu US\$0,50 durante loron 90. Tribunál aplika mós pena alternativu durante loron 60 iha prizaun kuandu arguidu la kumpri pena multa refere.

#### **7. Kazu krime ofensa ba integridade fízika simples no danu simples- Nu. Prosesu: 186/Crm.S/13.TDB**

Kompozisaun Tribunál	: Singulár
Juis	: Dr. Afonso Carmona
Ministeriu Publiku	: Dr. Luis Hernani Rangel da Cruz
Defeza	: Dr. Jonas Henrique da Costa
Konkluzaan	: Kondena ho pena uniku fulan 8 suspende ba tinan 1

Iha 09 Jullu 2014, Tribunál Distritál Baucau julga kazu krime ofensa ba integridade fízika simples no danu simples ne'ebé komete hosi arguidu AS hasoru MX, iha 30 Marsu 2011, iha Luro, Distritu Lautem.

Ministériu Públiku akuza katak iha 30 Marsu 2011, maizumenus iha oras tuku 08:30 dader, arguidu tuku dala ida iha lezadu nia tilun no tebe dala ida iha lezadu nia kabun to'o lezadu monu ba rai, foti ai tuku dala tolu iha lezadu nia kotuk laran no Aleinde ne'e aruidu tuda rahun lezadu nia dapur. Ba aktu hira ne'e, lezadu hetan prejuizu ba nia dapur aat hamutuk US\$40.00.

Kazu ne'e akontese tanba lezadu loke dalan liuhosi arguidu nia kintal laran no estraga arguidu nia ai oan sira. Antes ne'e lezada bolu atensauan ba arguidu atu labele liuhosi dalan refere maibé arguidu la importansia ba lezadu nia liafuan. Lezadu la'o besik ba arguidu no arguidu direktamente baku, tuku no tebe lezadu.

Ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 258 Kódigu Penál kona-ba danu simples.

Iha prosesu julgamentu arguidu deklara katak iha momentu ne'eba nia hamutuk ho nia feen no oan atu ba ospital. Arguidu sira liuhusi lezadu nia kintal tanba dalan ne'e ema barak liu. Derepente arguidu rona lezadu tolok nia tanba ne'e arguidu hakbesik an no dehan ba lezadu katak dalan ne'e ema barak liu, lezadu la hatan maibe' tuku dala rua iha arguidu nia hirus matan no hasan.

Hetan reasaun hanesan ne'e halo arguidu mos tebe monu lezadu no arguidu kontinua buti lezadu nia kakorok. Iha momentu ne'eba lezadu nia alin lori samurai atu ba taa arguidu mak arguidu halai.

Arguidu rekoñese katak nia tuda duni lezadu nia odamatan to'o kuak maibe' rekuza katak nia estraga lezadu nia dapur.

Entretantu lezadu deklara katak arguidu hamutuk ho nia feen no oan la'o duni liuhusi nia kintal no iha momentu ne'eba nia hase arguidu no nia familia atu la bele liu husi fatin ne'e. Arguidu la simu hodi tolok hasoru lezadu no dehan katak rai ne'e la'os lezadu nian. Lezadu hatutan katak arguidu kontinua hakbesik a'an ba nia no tuku dala ida iha lezadu nia hirus matan, tebe dala ida iha kabun to'o monu ba rai. Arguidu kontinua foti ai baku dala ida iha kabas no baku dala ida iha lezadu nia liman sikun sorin los. Lezadu konsege halai nune'e arguidu kontinua tuda lezadu nia odamatan rua no janela rua to'o kuak hotu. Arguidu mos fukit sai airin hat dapur nian.

Testamuna SM , OC no AX depoimentos katak sira la hare ho matan akontesimentu maibe' rona deit informasaun katak arguidu no lezadu iha problema tanba dalan.

Iha alegasaun final, ministériu públiku husu ba tribunál atu aplika pena prizaun fulan 3 no suspende ba tinan 1 ba krime ofensa ba integridade fízika simples.

Enkuantu ba krime danu simples, arguidu nega faktus tanba ne'e ministériu públiku husu ba tribunál aplika pena prizaun tinan 2 no suspende ba tinan 3 no husu ba tribunál fiksa mos indemnizasaun sivil ba arguidu.

Defeza husu ba tribunál atu aplika pena admoestasaun ba krime ofensa ne'ebe' arguidu komete hasoru lezadu tanba iha momentu ne'eba arguidu defende nia aan hosi lezadu. Ba krime danu simples, husu atu tribunál kondena arguidu selu indemnizasaun sivil ba lezadu.

Iha 30 Jullu 2014, tribunál konklui prosesu kazu ne'e no kondena arguidu ho pena úniku fulan 8 prizaun suspende ba tinan 1 no selu kustus judisial US\$20,00 no absolve arguidu hosi kondensasaun atu selu indemnizasaun ba lezadu.

## **8. Kazu krime ofensa ba integridade fízika simples - Nuc. 0265/12.PDBAU**

Kompozisaun Tribunál : Singular  
Juis : Dr. Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dra. Mujariah  
Konkluzau : Kondena ho pena multa US\$90.00

Iha 09 Jullu 2014, Tribunál Distritál Baucau kondena arguida Amelia da Costa Carvalho no Muhammad Niko ho pena multa US\$90,00 tanba provadu komete krime ofensa ba integridade fízika simples hasoru lezadu Domingos da Costa Belo. Kazu ne'e akontese iha 01 Jullu 2012 iha Tirilolo, Distritu Baucau.

Tribunál konklui katak arguida Amelia da Costa Carvalho aperta lezadu nia faru gola no tuku dala tolu iha lezadu nia hirus matan. Arguidu Muhammad Niko tuku lezadu dala ida iha tilun, dala ida iha ibun no dala ida iha matan to'o lezadu monu ba rai. Arguidu Mohammad kontinua buti lezadu nia kakorok no ho hanehan ho aintur ba lezadu nia hirus matan. Kazu ne'e akontese tanba lezadu baku arguidu nia feen ne'ebé mós nu'udar arguida Amelia da Costa Carvalho nia bin.

Tribunál mós konsidera sirkunstansia atenuantes hanesan arguidu sira primeira-ves komete krime.

Bazeia ba faktu sira ne'e, tribunál kondena arguidu ho pena multa US\$90,00 ne'ebé sei selu kada loron US\$1,00 durante loron 90. Tribunál mós kondena arguidu selu indemnizasaun sivil US\$50.00 inklui kustu judisiál US\$10.00. Tribunál aplika pena alternativu atu arguidu kumpri iha prizaun durante loron 60 kuandu arguidu la selu pena multa refere.

### **9. Kazu krime ofensa ba integridade fízika simples ho natureza violénsia doméstika - Nuc. 0174/12.PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Aderito Tilman  
Defeza : Dr. Grigorio de Lima  
Konkluzau : Kondena ho pena multa US\$30.00

Iha 09 Jullu 2014, Tribunál Distritál Baucau hala'o prosesu julgamentu ba arguidu GdC ne'ebé involve iha krime ofensa ba integridade fízika simples hasoru GdC nu'udar nia fen. Kazu ne'e akontese iha 04 Abril 2012 iha Laklo, Distritu Manatutu.

Ministériu Públiku akuza katak iha 04 Abril 2012, maizumenus iha oras tuku 15:00 dader, arguidu tebe dala ida iha lezada nia kanotak no tuku dala ida iha lezada nia matan fukun. Kazu ne'e akontese tanba diskuti malu relasiona ho bibi ne'ebé arguidu fan no la fo hatene lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha prosesu julgamentu arguidu konfesa no rekoñese ninia hahalok hasoru lezada. Arguidu mós deklara katak nia arrepende no agora dadaun sira diak malu ona.

Iha alegasaun finál, ministériu públiku husu ba tribunál atu aplika pena prizaun fulan 3 no suspende ba fulan 6 tanba arguidu konfesa ninia hahalok.

Defeza husu ba tribunál atu aplika pena ne'ebé adekuaudu tanba arguidu foin primeira-ves komete krime ne'e.

Iha 31 Jullu 2014, tribunál prezide leitura sentese no kondena arguidu ho pena multa US\$30,00 ne'ebé sei selu kada loron US\$0,50 durante loron 60 no kustu judisial US\$10.00. Tribunál aplika mós pena alternativa loron 40 kumpri iha prizaun kuandu arguidu la selu pena multa refere.

#### **10. Kazu krime maustratus ba kónjuje - Nuc. 0295/13.PDBAU**

Kompozisaun Tribunál : Koletivo  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Jonas Henrique da Costa  
Konkluzau : Adia

Iha 09 Jullu 2014, Tribunál Distritál Baucau julga krime maustratus ba kónjuje ne'ebé involve JB hasoru LA. Kazu ne'e akontese iha 15 Maiu 2013, iha Laikara, Distritu Lautem.

Tribunál adia prosesu julgamentu ba kazu ida ne'e tanba arguidu no lezada la marka prezenza maske hetan ona notifikasaun no tribunál seidak determina data julgamentu foun ba kazu ne'e.

#### **11. Kazu krime ofensa ba integridade f'izika simples ho natureza violénsia doméstika - Nuc. 0019/14.PDBAU**

Kompozisaun Tribunál : Singulár  
Juis : Dr. Jose Gonsalves  
Ministériu Públiku : Dr. Luis Hernani Rangel da Cruz  
Defeza : Dr. Americo Luis Freitas Belo  
Konkluzau : Adia

Iha 09 Jullu 2014, Tribunál Distritál Baucau adia prosesu julgamentu ba krime ofensa ba integridade fizika simples ne'ebé komete hosi arguidu SS hasoru RF, ne'ebé akonetse iha 28 Dezembru 2013, iha Aiteas, Distritu Manatuto.



Tribunál adia prosesu julgamentu ba kazu ida ne'e tanba arguidu no lezada la marka prezenza maske hetan notifikasaun no tribunál seidak marka data julgamentu foun ba kazu ne'e.

## **12. Kazu krime ofensa ba integridade física simples ho natureza violénsia doméstika - Nuc. 0257/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Luis Hernani Rangel da Cruz  
Defeza : Dr. Americo Luis Freitas Belo  
Konkluzaan : Kondena ho pena prizaun fulan 6 suspende tinan 1

Iha 10 Jullu 2014, Tribunál Distritál Baucau hala'o prosesu julgamentu ba arguidu CRS ne'ebé akuzadu ba krime ofensa ba integridade física simples hasoru JdCB nu'udar nia feen, iha 22 Maiu 2013, iha Buibau, Distritu Baucau.

Ministériu Públiku akuza katak iha 22 Maiu 2013, maizumenus iha oras tuku 10:00 dader, arguidu tolok lezada no foti fatuk tuda iha lezada nia liman sorin karuk no soe hotu roupa sira ba rai. Aktus ne'e rezulta lezada nia liman sofre kanek. Kazu ne'e akontese tanba arguidu la hetan gajolina jerigen ida ne'ebé atu ense ba motor.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 3, 35 (b) Lei Violénsia Doméstika .

Iha audiensia julgamentu, arguidu konfesa, rekoñese no arrepende ba ninia hahalok hasoru lezada. Arguidu mós deklara katak sira agora diak malu ona hanesan feen ho laen. Alende ne'e, lezada mós kontinua reforsa faktu sira iha akuzasaun.

Iha alegasaun final ministériu públiku husu ba tribunál atu aplika pena prizaun tinan 1 no suspende ba tinan 2.

Entretantu defeza argumenta katak arguidu foin primeira-ves komete krime, arrepende ba nia hahalok no sira diak malu ona, tanba ne'e husu ba tribunál aplika pena multa.

Iha 15 Jullu 2014, tribunál prezide leitura sentensa no kondena arguidu ho pena prizaun fulan 6 suspende ba tinan 1. Tribunál aplika kustus judisiál US\$30,00 ba arguidu.

## **13. Kazu krime abuzu poder no pekulatu - Nuc. 0485/13.PDBAU**

Kompozisaun Tribunál : Koletivu  
Juis : Dr. Afonso Carmona, Dr. Jose Goncalves, Dr. Hugo da Cruz Pui  
Ministériu Públiku : Dr. Aderito Tilman  
Defeza : Dr. Pedro Aparicio

Konkluziun : Sei kontinua prosesu

Iha 10 Jullu 2014, Tribunál Distritál Baucau hala'o julgamentu ho agenda apresenta alegasaun finál hosi ministériu públiku no defeza ba kazu krime abuzu poder no pekulatu ne'ebé diskunfia involve arguidu PAGP hosi Ministériu Obras Públiku Regional Baucau iha 08 Maiu 2012, iha Distritu Baucau.

Ministeriu Públiku alega katak arguidu provadu autoriza testemuña NXF nu'udar motorista hodi ba faan sasan ne'ebé partensia ba Estadu iha Kompania Express Distribution Service, Ltd (EDS) iha Dili. Material sira ne'e hanesan roda whel greder 1, kamara de ar 1, kamara de ar skavadora 1 ho folin hamutuk US\$3,000.00.

Hosi osan US\$3,000.00 ne'e arguidu fo US\$1,500 ba testemuña AdGF nu'udar assisten administrasaun no finansa iha obras publiku regional Baucau. Osan ne'e arguidu fo hodi sosa nesesidade ba obras públiku nian no restu hamutuk US\$1,500 arguidu uza hodi sosa laptop ne'ebé arguidu uza ba privadu.

Ministériu Públiku husu ba tribunál atu kondena arguidu ho pena prizaun tinan hitu (7) inklui mós kondena arguidu selu indemnizasaun sivil tanba konsidera faktu provadu.

Defeza husu ba tribunál atu absolve arguidu hosi akuzasaun ministériu públiku maibé se karik tribunál iha hanoin seluk maka defeza husu atu tribunál aplika suspensaun ba pena tanba arguidu faan ekipamentus refere hodi atende nesesidade obras Públiku Regional Baucau.

Depois rona alegasaun finál, tribunál marka fila fali ba iha 31 Agostu 2014, tuku 15:30 lorokraik ho agenda desizaun finál.

#### **14. Kazu krime ofensa ba integridade fízika simples - Nuc. 0156/14.PDBAU**

Kompozisaun Tribunál : Singulár

Juis : Dr. Dr. Hugo da Cruz Pui  
Ministériu Públiku : Dr. Luis Hernani Rangel da Cruz  
Defeza : Dr. Jonas Henrique da Costa  
Konkluziun : Kondena pena multa US\$60.00

Iha 09 Jullu 2014, Tribunál Distritál Baucau kondena arguida Teresa Maria Ximenes ho pena multa US\$60,00 tanba arguida provadu komete krime ofensa ba integridade fízika simples hasoru a Dircia Fernandes Belo. Kazu ne'e akontese iha 12 Janeiru 2014, iha Suku Tirilolo, Distritu Baucau.

Tribunál prova katak iha loraon 12 Janeiru 2014, arguida ba iha lezada nia uma no foti ai pedasuk ida baku iha lezada nia kelen tanba arguida diskunfia lezada namora ho nia laen.

Durante julgamentu arguida deklara katak nia baku duni lezada hanesan haktuir iha akuzasaun ministériu públiku. Maske nune'e, arguida deklara katak nia arrepende ninia hahalok.

Depois avalia faktu hotu hosi kazu ne'e, tribunál kondena arguida ho pena multa US\$60,00 ne'ebé sei selu kada loron US\$1,00 durante loron 60 inklui kondena kustus judisiál US\$10.00 ba arguida. Tribunál aplika mós pena alternativu loron 40 iha prizaun kuandu arguidu la selu pena multa refere.

#### **15. krime ofensa ba integridade fizika simples ho natureza violénsia doméstika - Nuc. 0498/11.PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Pascasio de Rosa Alves  
Defeza : Dr. Juvinal Yanes  
Konkluzau : Kondena pena prizaun fulan 10 suspende tinan 1

Iha 10 Julu 2014, Tribunál Distritál Baucau julga kazu krime ofensa ba integridade fízika simples ne'ebé involve arguidu RdC nia feen. Kazu ne'e akontese iha 08 Outubru 2011, iha Waimori, Distritu Viqueque.

Ministériu Públiku akuza katak iha 04 Abril 2013 maizumenus iha tuku 12:00 meudia, arguidu tolok no riba lezada ba rai. Kazu ne'e akontese tanba lezada hare ho matan halo hela relasaun seksuál ho fetu ida iha fetu ne'e nia uma no tanba ne'e sira diskuti malu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika

Iha prosesu julgamentu arguidu rekuza faktus iha akuzasaun laran. Arguidu deklara katak lezada kous oan, kaer tudik no hakilar tanba ne'e arguidu hakbesik aan ba lezada hodi hadau tiha tudik ne'e. Iha momentu hadau tudik ne'e mak lezada monu.

Lezada deklara katak iha momentu ne'eba nia kous ninia oan duni atu ba ko'a hare. Maibe wainhira lao liuhosi fetu ida nia uma, lezada hare arguidu halo hela relasaun seksuál ho fetu ne'e iha uma laran. Lezada hakbesik tama ba uma laran, arguidu riba lezada ba rai no fetu ne'e halai tiha ba natar laran.

Iha alegasaun finál ministériu públiku husu atu tribunál aplika pena prizaun tinan 1 ou pena multa ba arguidu. Enkuantu, defeza argumenta katak arguidu halo lejitima defeza ba nia an momentu nia hare lezada hasoru nia ho tudik. Defeza mós hare sirkunstansia atenuante katak arguidu foin primeira-vesmeruves komete krime, arguidu arrepende ba nia hahalok ne'e duni defeza husu tribunál kondena arguidu ho pena multa.

Tribunál konklui prosesu ne'e liuhosi julgamentu movel iha Ossu, Viqueque, iha 21 Jullu 2014, no kondena arguidu ho pena prizaun fulan 10 suspende ba tinan 1.

**16. Kazu krime ofensa ba integridade fízika agravadu no ofensa ba integridade fizika simples - Nuc. 0466/12.PDBAU**

Kompozisaun Tribunál : Koletivu  
Juis : Dr. Jose Goncalves, Dr. Antonio Fonseca, Dr. Hugo da Cruz Pui  
Ministériu Públiku : Dr. Aderito Tilman  
Defeza : Dr. Jonas Henrique da Costa  
Konkluzaan : Kondena pena únika tinan 2 suspende ba tinan 3

Iha 11 Jullu 2014, Tribunál Distritál Baucau hala'o julgamentu ba arguidu JFdC ne'ebé akuzadu involve iha krime ofensa ba integridade fízika agravadu no simples hasoru CdC no AFdAB, iha iha 24 Setembru 2012, iha Tirilolo, Distritu Baucau.

Ministériu Públiku akuza katak iha 24 Setembru 2012, tuku 11:00 kalan, arguidu ho tudik sona dala ida iha CdC nia kabun no sona dala rua iha lezadu AFdAB nia liman no ain kabun wainhira lezadu AFdAB tenta atu hadau tudik hosi arguidu. Aktu ne'e rezulta CdC hetan kanek iha kabun no AFdAB hetan kanek iha ain kabun. Kazu ne'e akontese tanba arguidu no lezadu sira lanu iha festa ida no sira diskuti malu kona-ba fetos san umane.

Ministériu Públiku akuza arguidu kontra artigu 146 Kódigu Penál kona-ba ofensa ba integridade fizika agravadu konjuga ho artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu deklara katak sira lanu hotu no depois sira diskuti malu kona-ba fetos san umane. Arguidu tama ba dapur laran foti tudik. Iha momentu ne'eba lezadu sira tenta hadau tudik mak kona sira to'o kanek. Arguidu mós deklara katak iha momentu ne'eba nia lanu hela no lahatene krime ne'ebé nia halo. Maske nune'e nia deklara katak nia arrende ninia hahalok.

CdC hanesan lezadu deklara katak akuzasaun los tanba iha momentu ne'eba sira lanu iha festa ida no arguidu no AFdAB diskuti-malu kona-ba asuntu fetos-san umane no iha momentu ne'eba derepente arguidu ba dapur foti tudik no sona nia kabun.

Alende ne'e, AFdAB hanesan mós lezadu deklara katak depois arguidu sona tiha lezadu CdC nia kabun nia ba hadau tudik mak arguidu sona nia iha liman no ain kabun.

Iha alegasaun finál, ministériu públiku husu ba tribunál kondena arguidu ho pena prizaun tinan 5. Entretantu defeza husu ba tribunál atu kondena arguidu ho pena ne'ebé adekua tanba defeza arguidu foin primeira-ves komete krime no deklara ba tribunál katak arrende ninia hahalok.

Iha 30 Jullu 2014, tribunál konklui prosesu kazu ne'e no kondena arguidu Jorge Fransisco da Costa ho pena úniku tinan 2 suspende ba tinan 3.

### **17. Kazu krime omisídiu agravadu - Nuc. 0240/14.PDBAU**

Kompozisaun Tribunál : Koletivu  
Juis : Dr. Antonio Fonseca, Dr. Afonso Carmona, Dr. Hugo da Cruz Pui  
Ministériu Públiku : Dr. Luis Hrnani Rangel da Cruz  
Defeza : Dr. Grigorio de Lima  
Konkluzau : Sei kontinua prosesu

Iha 14 Jullu 2014, Tribunál Distritál Baucau hala'o julgamentu ba kazu krime omisídiu agravadu ne'ebé diskunfia involve arguidu FFM hasoru Delfin Freitas Vital (matebian). Kazu ne'e akontese iha 07 Abril 2014, iha Suku Samalari, Distritu Baucau.

Ministériu Públiku akuza katak iha 07 Abril 2014, maizumenus iha oras tuku 06:00 dader arguidu taa iha lezadu nia ulun, ain tur no taa kakorok. Aktus ne'e rezulta lezadu mate kedas iha fatin akontesimentu. Kazu ne'e akontese iha xefi knua hosi sira nia uma lisanida nia uma iha momentu arguidu no lezadu ba atu hato'o katak sira sempre iha problema.

Ministériu Públiku akuza arguidu kontra artigu 139 Kódigu Penál kona-ba omisídiu agravadu.

Iha audiensia julgamentu arguidu konfesa no deklarata katak nia mak taa duni lezadu hanesan haktuir iha akuzasaun ministériu públiku. Tanba arguidu konfesa, tribunál marka kedas ba alegasaun finál.

Iha alegasaun finál, ministériu públiku husu ba tribunál atu kondena arguidu ho pena prizaun tinan 20.

Entretantu defeza husu atu tribunál kondena arguidu ho pena ne'ebé adekuaudu tanba arguidu foin primeira-ves komete krime no arguidu mós arrepende ninia hahalok.

Depois rona tiha alegasaun finál, tribunál marka fila fali ba iha 24 Jullu 2014, tuku 14:30 lorokraik ho agenda leitura akordaun.

### **18. Krime ofensa ba integridade fízika simples ho natureza violénsia doméstika - Nu. Prosesu : 285/Crm.S/13.TDB**

Kompozisaun Tribunál : Singulár  
Juis : Dr. Jose Goncalves  
Ministeriu Publiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Kondena pena prizaun fulan 3 suspende tinan 1

Iha 15 Jullu 2014, Tribunál Distritál Baucau julga arguidu NMdS ne'ebé komete krime ofensa ba integridade fízika simples hasoru nia feen. Kazu ne'e akontese iha 19 Jullu 2013, iha Bahu, Distritu Baucau.

Ministériu Públiku akuza katak iha 19 Jullu 2013 maizumenus iha tuku 06:00 dader, arguidu ho ai ida baku iha lezada nia kotuk laran, kelen los no iha kakorok. Kazu ne'e akontese tanba arguidu no lezada diskuti-malu relasiona ho lezada la fo han sira nia asu no prepara matabisu tarde.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha prosesu julgamentu arguidu konfesa no deklara katak nia arrepende ba ninia hahalok hasoru lezada. Arguidu no lezada diak malu ona no moris hamutuk hanesan feen no laen.

Iha alegasaun finál, ministériu públiku husu ba tribunál aplika pena prizaun fulan 6 suspende ba tinan 1.

Entretantu defeza husu ba tribunál atu aplika pena ne'ebé adekuaudu tanba arguidu foin primeira-ves komete krime, arrepende no sira moris hamutuk fila fali ona nu'udar feen no laen.

Iha 31 Jullu 2014, tribunál konklui prosesu ne'e no kondena arguidu ho pena prizaun fulan 3 suspende ba tinan ida.

**19. Kazu krime ofensa ba integridade fízika simples ho natureza violénsia doméstika - Nu. Prosesu : 292/Crm.S/13.TDB**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzau : Adia

Iha 17 Jullu 2014, Tribunál Distritál Baucau halo audiensia hodi adia prosesu julgamentu ba kazu krime ofensa ba integridade fízika simples ne'ebé komete hosi arguidu DLHS hasoru lezada DdCS. Kazu ne'e akontese iha 17 Abril 2013, iha Distritu Manatuto.

Tribunál adia prosesu julgamentu tanba lezada foin partus tanba ne'e, tribunál marka fila fali prosesu julgamentu ba iha orariu tribunál movel nian iha 25 Agostu 2014, tuku 10:00 dader iha Distritu Manatuto.

**20. Kazu krime ofensa ba integridade fízika simples ho natureza violénsia doméstika - Nuc. 0372/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Horta Ramos  
Konkluzau : Kondena pena fulan 6 suspende tinan 1

Iha 15 Jullu 2014, Tribunál Distritál Baucau hala'o julgamentu ba arguidu MASdC ne'ebé komete krime ofensa ba integridade fízika simples hasoru nia feen, iha 19 Jullu 2013, iha Bahu, Distritu Baucau.

Ministériu Públiku akuza katak iha 20 Agostu 2013 maizumenus iha oras tuku 06:00 dader, arguidu tuku iha lezada nia liman, a ulun no tebe iha kotuk laran. Kazu ne'e akontese tanba sira diskuti malu kona-ba arguidu koalia ho feto ida liuhosi telefone.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha julgamentu arguidu konfesa no deklara katak nia arrepende, diak malu ona ho lezada no sira moris hanesan feen no laen. Alende ne'e, lezada mos konfirma katak sira diak malu ona no moris hamutuk hanesan fen no laen.

Iha alegasaun finál, ministériu públiku husu ba tribunál atu aplika pena ne'ebé adekuaudu ba arguidu. Parte defeza mós husu ba tribunál atu aplika pena ne'ebé adekuaudu tuir sirkunstansia atenuantes sira, hanesan arguidu foin primeira-ves komete krime, arrepende, diak malu ona no moris hamutuk hanesan feen no laen.

Iha 15 Jullu 2014, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

## **21. Kazu krime ofensa ba integridade fízika simples ho natureza violénsia doméstika - Nuc. 0310/12.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr.Horta Ramos  
Konkluzau : Sei kontinua prosesu

Iha 21 Jullu 2014, Tribunál Distritál Baucau liuhosi julgamentu movel iha Sub-distritu Ossu, Distritu Viqueque, julga kazu krime ofensa ba integridade fízika simples ne'ebé involve arguidu FdC hasoru nia feen. Kazu ne'e akontese iha 19 Jullu 2012, iha Ossu, Distritu Viqueque.

Ministériu Públiku akuza katak iha loron 19 Jullu 2012, tuku 06:00 dader, arguidu aperta makas lezada nia kakorok. Kazu ne'e akontese tanba lezada toman arguidu iha fetu ida nia uma no iha momentu ne'eba arguidu la toba iha uma durante kalan rua ona.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Voolénsia Doméstika.

Iha audiensia julgamentu arguidu deklara katak nia aperta lezada ninia kakorok tanba lezada tolok nia. Maske nune'e, arguidu rekoñese katak akuzasaun hosi ministériu públiku ne'e loos.

Alende ne'e, lezada deklara katak akuzasaun loos no agora dadaun sira nain rua moris separadu ona no arguidu moris moris hamutuk ho fetu refere.

Iha alegasaun finál ministériu públiku husu ba tribunál atu aplika pena ne'ebé adekuaudu. Hanesan mós ho ministériu públiku, parte defeza mós husu ba tribunál atu aplika pena ne'ebé adekuaudu ba arguidu tanba arguidu foin primeira-ves komete krime no arrepende ba nia hahalok.

Depois rona tiha alegasaun, tribunál marka julgamentu ba iha 18 Agostu 2014, tuku 10:00 dader ho agenda rona desizaun finál.

## **22. Kazu krime ofensa ba integridade fízika simples ho natureza violénsia doméstika - Nuc. 0042/14.PDBAU**

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzaan	: Sei kontinua prosesu

Iha 21 Jullu 2014, Tribunál Distritál Baucau liuhosi julgamentu movel iha Sub-distritu Ossu, Distritu Viqueque hala'o prosesu julgamentu ba kazu krime ofensa ba integridade fízika simplés ne'ebé komete hosi arguidu DH hasoru nia feen. Kazu ne'e akontese iha 23 Dezembru 2013, iha Ossu, Distritu Viqueque.

Ministériu Públiku akuza katak iha 23 Dezembru 2013 maizumenus iha oras tuku 07:30 dader, arguidu ho lezada diskuti malu kona-ba karau ne'ebé estraga sira nia toos. Iha momentu ne'eba lezada koalia la para tanba ne'e arguidu nervozu hodi foti ai ida baku iha lezada nia rein toos to'o hetan kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu no artigu tuir artigu 3, 35 (b) Lei Violénsia Doméstika.



Iha prosesu julgamentu arguidu konfesa no deklarata katak nia arrepende ba ninia hahalok. Arguidu mós deklarata katak agora dadaun sira moris bain-bain hanesan feen no laen.

Iha alegasaun final, ministériu públiku husu ba tribunál atu aplika pena prizaun fulan 3 no suspende ba tinan 1.

Defeza husu ba tribunál aplika pena ne'ebé adekuaudu tanba arguidu foin primeir-ves komete krime no arrepende ba nia hahalok.

Depois rona tiha alegasaun final, tribunál marka fila fali julgamentu ba 18 \ Agostu 2014, tuku 10:00 dader ho agenda desizaun finál.

### **23. Kazu krime ofensa ba integridade fízika simples no natureza violénsia doméstika - Nuc. 0437/12.PDBAU**

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzaan	: Sei kontinua prosesu

Iha 21 Julu 2014, Tribunál Distritál Baucau liuhosi julgamentu movel iha Sub-distritu Ossu, Distritu Viqueque julga kazu krime ofensa ba integridade fízika simples ne'ebé involve arguidu VR hasoru RdS nu'udar nia fen. Kazu ne'e akontese iha 19 Setembru 2012, iha Ossu, Distritu Viqueque.

Ministériu Públiku akuza katak iha 19 Setembru 2012, maizumenus iha tuku 08:30 dader, arguidu lori karau ba iha uma mate (viziñu) no arguidu fila tarde, nune'e lezada la satisfas hodi tolok arguidu. Tanba ne'e, arguidu tuku dala rua iha lezada nia oin noibun to'o kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 3, 35 (b) Lei Violénsia Doméstika.

Iha prosesu julgamentu arguidu konfesa no rekoñese ninia hahalok ne'e. Arguidu hatutan katak iha momentu ne'ebá arguidu fila hosi mate uma lezada haruka arguidunia de'ut terigu atu halo dosi maibé arguidu lakohi tanba kole. Lezada hirus no tolok arguidu.

Iha alegasaun finál, ministériu públiku husu ba tribunál atu aplika pena ne'ebé adekuaudu tuir krime ne'ebé arguidu komete.

Defeza mós husu ba tribunál atu aplika pena ne'ebé adekuaudu ba arguidu tanba konsidera katak arguidu foin primeira-ves komete krime no arrepende nia hahalok.

Depois rona tiha alegasaun final, tribunál marka fila fali prosesu julgamentu ba iha 18 Agostu 2014, tuku 10:00 dader ho agenda rona desizaun finál.

**24. Kazu krime ofensa ba integridade fízika simples ho natureza violénsia doméstika - Nuc. 0536/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Sei kontinua prosesu

Iha 21 Jullu 2014, Tribunál Distritál Baucau liuhusi julgamentu movel iha Sub- distritu Ossu, Distritu Viqueque hala'o julgamentu ba kazu krime ofensa ba integridade fízika simples ne'ebé involve arguidu VR hasoru nia feen. Kazu ne'e akontese iha 22 Outubru 2013, iha Ossu, Distritu Viqueque.

Ministériu Públiku akuza katak iha 22 Outubru 2013, maizumenus iha tuku 15:30 lorokraik, arguidu tebe dala ida iha lezada nia kabun no tebe dala ida iha kidan. Arguidu kontinua tuku dala rua iha kotuk laran. Kazu ne'e akontese tanba lezada istori malu ho arguidu nia inan.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simplés konjugadu ho artigu 3, 35 (b) Lei Violénsia Doméstika.

Iha audiensia julgamentu arguidu konfesa, rekoñese no deklara katak nia arrepende ninia hahalok.

Iha alegasaun finál, ministériu públiku husu ba tribunál atu aplika pena ne'ebé adekuaudu ba arguidu. Alende ne'e, defeza, husu ba tribunál atu aplika pena ne'ebé adekuaudu ba arguidu tanba arguidu foin primeira-ves komete krime, arrepende no diak malu ona hanesan feen no laen.

Depois rona tiha alegasaun final, tribunál marka fila fali prosesu julgamentu ba 18 Agostu 2014, tuku 10:00 dader ho agenda desizaun finál.

**25. Kazu krime ameasa - Nuc. 0318/12.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Omologa

Iha 21 Jullu 2014, Tribunál Distritál Baucau liuhosi julgamentu movel iha Sub- distritu Ossu, Distritu Viqueque hala'o julgamentu tentativa konsiliaun ba kazu ameasa ne'ebé involve arguidu Filomeno Soares, Ambrosio Soares, Gracinda de Sousa no Sezunho Soares

hasoru Felismina da Costa. Kazu ne'e akontese iha 15 Abril 2012, iha Suku Wabubu, Ossu, Distritu Viqueque.

Ministériu Públiku akuza katak iha 15 Abril 2012, maizumenus iha oras tuku 18:30 arguidu sira ameasa atu oho lezada no sunu lezada nia uma. Kazu ne'e akontese tanba lezada atu ba tuir kampañe partidu Fretilin nian iha Ossu. Ministériu Públiku akuza arguidu sira kontra artigu 157 Kodigu Penal kona-ba krime ameasa.

Iha tentativa konsiliaun ne'e, lezada hakarak dada fila fali kazu ne'e maske hirus malu tinan rua ona tanba sira iha relasaun família. Arguidu sira mós husu diskulpa no entrega osan US\$100.00 ba lezada.

**26. Kazu krime ofensa ba integridade fízika simples ho natureza violénsia doméstika - Nuc. 0546/13.PDBAU**

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzaan	: Kondena ho pena multa US\$60.00

Iha 22 Jullu 2014, Tribunál Distritál Baucau liuhosi julgamentu movel iha Sub-distritu Uatucarbau, Distritu Viqueque hala'o julgamentu ba arguidu DM ne'ebé akuzadu komete krime ofensa ba integridade fízika simples hasoru nia feen. Kazu ne'e akontese iha 27 Outubru 2013, iha Uatucarbau, Distritu Viqueque.

Ministériu Públiku akuza katak iha 27 Outubru 2013, maizumenus iha tuku 09:00 dader, arguidu tebe dala ida no tuku dala ida iha lezada nia kotuk laran. Kazu ne'e akontese tanba arguidu diskunfia lezada mak foti nia osan US\$30,00.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Arguidu deklara katak akuzasaun hosi ministériu públiku los hotu, maibe agora dadaun sira diak malu ona no moris hamutuk hanesan feen no laen.

Iha alegasaun finál, ministériu públiku husu ba tribunál atu aplika pena prizaun fulan 6 no suspende ba tinan 1 ba arguidu. Defeza mós husu atu tribunál aplika pena ne'ebé adekuaudu tanba arguidu foin primeir-ves komete krime, arrepende no diak malu ona ho lezada hanesan nia feen.

Prosesu ne'e konklui iha 22 Jullu 2014, no tribunál kondena arguidu ho pena multa US\$60,00 ne'ebé kada loron arguidu sei selu US\$0,50 durante loron 120. Tribunál mós

aplika pena alternativa atu arguidu kumpri iha prizaun durante loron 80 kuandu arguidu la selu pena multa refere.

**27. Kazu krime ofensa ba integridade fízika simples ho natureza violénsia doméstika - Nuc. 0477/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Sei kontinua prosesu

Iha 22 Jullu 2014, Tribunál Distritál Baucau liuhosi julgamentu movel iha Sub- distritu Uatulari, Distritu Viqueque julga arguidu LP ne'ebé involve iha krime ofensa ba integridade fízika simples hasoru nia feen. Kazu ne'e akontese iha 16 Jullu 2013, iha Uatulari, Distritu Viqueque.

Ministériu Públiku akuza katak iha 16 Jullu 2013, maizumenus iha oras tuku 16:00 lorokraik, arguidu foti ai ida hodi baku dala dala rua iha lezada nia ulun, dala hat iha lezada nia kabas karuk no dala rua iha lezada nia ain karuk. Kazu ne'e akontese tanba lezada sulan karau tarde ba karau luhan.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Arguidu konfesa ninia hahalok no deklara katak nia ho lezada diak malu ona no moris hamutuk hanesan feen no laen.

Iha alegasaun final, ministériu públiku husu ba tribunál atu kondena arguidu ho pena prizaun tinan 1 suspende ba tinan 1.

Entretantu defeza husu ba tribunál atu aplika pena ne'ebé adekua ba arguidu tanba hare ba sirkunstansia atenuantes sira hanesan arguidu foin primeira-ves komete krime, arrepende no diak malu ona ho lezada hanesan fen no laen.

Depois rona tiha alegasaun final, tribunál marka fila fali julgamentu ba iha 18 Agostu 2014, tuku 10:00 dader ho agenda rona desizaun finál.

**28. Kazu krime ofensa ba integridade fízika simplés ho natureza violénsia doméstika - Nuc. 0371/11.PDBAU**

Kompozisaun Tribunál : Singulár  
Juis : Dr. Dr. Afonso Carmona  
Ministériu Públiku : Dr. Pascasio de Rosa Alves

Defeza : Dr. Jonas Henrique da Costa  
Konkluzaan : Kondena pena multa US\$75.00

Iha 22 Jullu 2014, Tribunál Distritál Baucau liuhosi julgamentu movel iha Sub-distritu Uatulari, Distritu Viqueque prezide leitura sentensa ba kazu krime ofensa ba integridade fízika simple ne'ebé komete hosi arguidu JB hasoru nia feen. Kazu ne'e akontese iha 17 Agostu 2011, iha Uatulari, Distritu Viqueque.

Tribunál prova katak arguidu tuku dala rua iha lezada nia hirus matan, tebe dala ida iha lezada nia kotuk laran no basa lezada dala ida.

Bazeia ba prosesu sira ne'ebé halao ona antes, tribunál konklui prosesu ne'e no kondena arguidu ho pena multa US\$75,00 ne'ebé sei selu kada laron US\$0,50 duranten laron 150. Tribunál mós aplika pena alternativa ba arguidu atu arguidu kumpri iha prizaun durante laron 100 kuandu arguidu la selu pena multa refere.

**29. Kazu krime ofensa ba integridade fízika simples ho natureza violénsia doméstika  
- Nuc. 0546/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzaan : Kondena pena prizaun fulan 11 suspende tinan 1

Iha 23 Jullu 2014, Tribunál Distritál Baucau liuhosi julgamentu movel iha Sub-distritu Lakluta, Distritu Viqueque hala'o julgamentu ba arguidu SdC ne'ebé akuzadu ba krime ofensa ba integridade fízika simples hasoru feen. Kazu ne'e akontese iha 16 Janeiru 2014, iha Lakluta, Distritu Viqueque.

Ministériu Públiku akuza katak iha 16 Janeiru 2014, iha tuku 13:00 meudia, arguidu fila husi toos lori ho ai. Wainhira to'o iha uma sira nia asu hatenu hasoru arguidu no halo arguidu hakfodak. Tanba ne'e arguidu foti katana hodi tuda asu refere kona iha asu nia liman to'o kanek. Tanba ne'e lezada hirus no tolok arguidu momentu hare sira nia asu hetan kanek. Wainhira rona lezada tolok, arguidu mós sai hiru no kaer katana see ba lezada nia kakorok no rezulta lezada nia kakorok sofre sinál kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha julgamentu arguidu konfesa faktu sira ne'ebé akuza ba nia no deklarata katak nia arrepende nia hahalok. Aleinde ne'e, arguidu mós hatutan katak nia diak malu ona ho lezada no sira moris normal hanesan feen no laen.

Iha alegasaun final, Ministériu Públiku husu tribunál atu aplika pena ne'ebé adekuadu, tanba arguidu provadu komete krime ne'e.

Defeza mós husu ba tribunál atu kondena arguidu ho pena adekuadu ba arguidu tanba arguidu foin primeira-ves komete krime, arrende ba nia hahalok no sira diak malu ona.

Iha 23 Jullu 2014, tribunál prezide leitura sentensa ba kazu ne'e no kondena arguidu ho pena prizaun fulan 11 suspende ba tinan 1.

### **30. Kazu krime ofensa ba integridade física simples ho natureza violência doméstica - Nuc. 0539/13.PDBAU**

Kompozisaun Tribunál	: Singulár
Juis	: Dr. Antonio Fonseca
Ministeriu Publiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzaan	: Kondena pena prizaun fulan 6 suspende ba tinan 1

Iha 23 Jullu 2014, Tribunál Distritál Baucau liuhosi julgamentu movel iha Sub-distritu Lakluta, Distritu Viqueque julga kazu krime ofensa ba integridade física simples ne'ebé komete hosi arguidu MR hasoru nia feen. Kazu ne'e akontese iha 15 Jullu 2013, iha Lakluta, Distritu Viqueque.

Ministériu Públiku akuza katak iha 15 Jull 2013, maizumenus iha tuku 14:00 lorokraik lezada ho nia alin tu'ur halimar hela, arguidu to'o mai hirus no dehan ba lezada katak lezada feto beikten no husu lezada atu nonok. Depois koalia tiha hanesan ne'e arguidu foti katana ida taa iha lezada nia liman to'o hetan kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 3, 35 (b) Lei Violência Doméstica.

Iha prosesu julgamentu arguidu konfesa no rekoñese ninia hahalok ne'ebé nia komete ona hasoru lezada. Maske nune'e, depois akontesementu sira diak maluk no moris hamutuk fali hanesan feen no laen. Arguidu mós hatutan katak nia komete krime ne'e tanba nia fila hosi to'os hamlaha, to'o uma etu laiha. Tanba ne'e mak halo arguidu hirus hodi baku lezada.

Iha alegasaun final, ministériu públiku husu ba tribunál atu aplika pena ne'ebé adekuadu ba arguidu. Alende ne'e defeza mós husu ba tribunál atu aplika pena ne'ebé adekuadu tuir sirkunstansia atenuantes sira hanesan arguidu foin primeira-ves komete krime, arrende nia hahalok, diak malu ona no moris hamutk hanesan feen no laen.

Iha 23 Jullu 2014, tribunál konklui prosesu ne'e no kondena arguidu ho pena prizaun fulan 1 suspende ba tinan 1 tanba arguidu provadu komete krime ofensa ba integridade física hasoru lezada.

**31. Kazu krime ofensa ba integridade fízika simples ho natureza violénsia doméstika - Nuc. 0430/13.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Kondena ho pena multa US\$45.00

Iha 24 Jullu 2014, Tribunál Distritál Baucau liuhosi julgamentu movel iha Sub-distritu Viqueque Vila, Distritu Viqueque hala'o julgaamentu ba kazu krime ofensa ba integridade fízika simples ne'ebé komete hosi arguidu IS hasoru nia feen. Kazu ne'e akontese iha 22 Setembru 2013, iha Maluru, Distritu Viqueque.

Ministériu Públiku akuza katak iha 22 Setembru 2013, maizumenus iha tuku 15:30 lorokraik, arguidu foti motor nia volante baku dala ida iha lezada nia liman, dala ida iha lezada nia kabas no dala ida iha lezada nia kelen. Kazu ne'e akontese tanba lezada ba iha Venilale la fo hatene arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha prosesu julgamentu, arguidu konfesa no rekoñese hotu faktus ne'ebé ministériu públiku akuza hasoru nia, arrepende nia hahalok, diak malu ona ho lezada no moris hamutuk hanesan feen no laen.

Iha alegasaun finál, ministériu públiku husu ba tribunál atu aplika pena ne'ebé adekuaudu ba arguidu. Defeza mós husu ba tribunál atu aplika pena adekuaudu ba arguidu tuir sirkunstánsia atenuantes sira hanesan arguidu konfesa, arrepende, foin primeira-ves halo krime, diak malu ona ho lezada no moris kontinua moris hamutuk hanesan nia feen ho laen.

Iha 25 Jullu 2014, tribunál konklui prosesu ne'e no kondena arguidu ho pena multa US\$45,00 ne'ebé sei selu kada lora US\$0,50 durante lora 90 no kondena mós atu selu kustus judisiál US\$10,00. Aleinde ne'e tribunál aplika pena alternativa ba arguidu atu kumpri iha prizaun durante lora 60 kuandu arguidu la selu pena multa refere.

**32. Kazu krime ofensa ba integridade fízika simples Nuc. 0559/12.PDBAU**

Kompozisaun Tribunál : Singulár  
Juis : Dr. Antonio Fonseca  
Ministeriu Publiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Kondena pena suspensaun tinan 1

Iha 24 Jullu 2014, Tribunál Distritál Baucau liuhosi julgamentu movel iha Sub-distritu Viqueque Vila, Distritu Viqueque hala'o julgamentu ba kazu krime ofensa ba integridade fízika simples ne'ebé involve arguidu GR hasoru nia aman. Kazu ne'e akontese iha 04 Novembru 2012, iha Waimori, Distritu Viqueque.

Ministériu Públiku akuza katak iha 04 Novembru 2013, maizumenus iha oras tuku 08:00 kalan, arguidu foti sikra tuda ba lezada nia liman to'o rezulta kanek. Arguidu no lezadu iha momentu ne'eba ho kondisaun lanu. Kazu ne'e akontese tanba arguidu foti lezadu nia sigaru sein koñesimentu hosi lezadu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu no artigu 3, 35 (b) Lei Violénsia Doméstika.

Iha prosesu julgamentu, arguidu deklara katak lezadu kaer dima no hodi fatuk tuda arguidu tanba ne'e mak arguidu tuda hasoru lezadu ho cikra kona lezadu nia liman. Arguidu arrepende ninia hahalok no depoisde akontesimentu sira nain rua diak malu fali ona hanesan aman no oan.

Lezada deklara katak sira hemu tua hamutuk iha uma laran no diskuti malu entre sira tanba lezadu nia sigaru lakon. Lezadu sai tiha ba liur, arguidu foti cikra tuda kona iha lezadu nia liman to'o kanek .

Iha alegasaun finál, ministériu públiku husu tribunál atu aplika pena prizaun fulan 6 supende ba tinan 1.

Entretantu defeza husu ba tribunál atu aplika pena admoestasaun tuir sirkunstansia atenuantes sira hanesan arguidu foin primeira-ves komete krime, arguidu arrepende ba nia hahalok no arguidu diak malu ona ho lezadu.

Iha 25 Jullu 2014, tribunál konklui prosesu ne'e no kondena arguidu ho pena prizaun fulan 6 suspende ba tinan 1 no kondena selu kustus judisial US\$10,00.

### **33. Kazu krime ofensa ba integridade fízika simples ho natureza violénsia doméstika - Nuc. 0456/13.PDBAU**

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzau	: Sei kontinua prosesu

Iha 24 Jullu 2014, Tribunál Distritál Baucau liuhosi julgamentu movel iha Sub-distritu Viqueque Vila, Distritu Viqueque hala'o julgamentu ba kazu krime ofensa ba integridade



fízika simples ne'ebé involve arguidu JB hasoru nia feen. Kazu ne'e akontese iha 24 Jullu 2013, iha Karaubalu, Distritu Viqueque.

Ministériu Públiku akuza katak iha 24 Jullu 2013, maizumenus iha tuku 15:00 lorokraik, arguidu, lezada no lezada nia família tu'ur hamutuk rezolve problema kona-ba arguidu ne'ebé dekonfia mane seluk tula lezada. Iha momentu ne'eba mak arguidu nervozu hodi basa lezada dala ida to'o monu ba rai.

Ministériu Públiku arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 3, 35 (b) Lei Violénsia Doméstika.

Iha prosesu produsaun ba provas, arguidu hili direitu nonok durante prosesu julgamentu. Entretantu lezada deklara katak iha momentu ne'eba arguidu deskonfia mane ida tula lezada. Tanba ne'e lezada nervoza hodi basa arguidu dala ida. Arguidu la simu no fila basa fali lezada dala ida to'o monu ba rai.

Iha alegasaun finál, ministériu públiku husu tribunál atu absolve arguidu husi prosesu ne'e tanba lezada mós basa arguidu. Hanesan mós parte defeza husu atu tribunál absolve arguidu tanba lezada mak basa uluk arguidu.

Depois rona tiha deklarasaun no alegasaun hosi parte sira, tribunál marka ba iha 18 Agostu 2014, tuku 10:00 dader ho rona leitura sentensa.

#### **34. Kazu krime ofensa ba integridade fízika simples - Nuc. 0367/12.PDBAU**

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Pascasio de Rosa Alves
Defeza	: Dr. Jonas Henrique da Costa
Konkluzaan	: Omologa prosesu no absolve arguidu

Iha 24 Jullu 2014, Tribunál Distritál Baucau liuhosi julgamentu movel iha Sub- distritu Viqueque Vila, Distritu Viqueque tribunál prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu Amriano Miquel hasoru Fernandes Soares, iha 13 Agostu 2013, iha Suku Uma Wain Kraik, Distritu Viqueque.

Liuhosi tentativa konsiliaun ne'e, lezadu ho inisiativa rasik hakarak dada fila fali kazu ida ne'e tanba arguidu no lezadu sei iha relasaun família (arguidu lezadu nia rian rasik).

Antes ne'e, Ministériu Públiku akuza katak iha 15 Abril 2012, maizumenus iha tuku 16:30 arguidu ba lezadu nia uma atu ba foti arguidu nia oan nain tolu ne'ebé arguidu nia feen lori hotu ba iha lezadu nia uma. Antes ne'e arguidu no nia fen iha ona problema. Tanba lezadu la autoriza arguidu foti nia oan mak arguidu buti lezadu nia kakorok.

**35. Kazu krime ofensa ba integridade fízika simples ho natureza violénsia doméstika - Nuc. 0467/11.PDBAU**

Kompozisaun Tribunál : Singulár  
Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Jonas Henrique da Costa  
Konkluzau : Sei kontinua prosesu

Iha 25 Jullu 2014, Tribunál Distritál Baucau liuhosi julgamentu movel iha Sub -distritu Viqueque Vila, Distritu Viqueque hala'o julgamentu ba kazu krime ofensa ba integridade fízika simples ne'ebé komete hosi arguidu AdCG hasoru nia feen. Kazu ne'e akontese iha 30 Dezembru 2011, iha Karaubalu, Distritu Viqueque.

Ministériu Públiku akuza katak iha 30 Dezembru 2011, maizumenus iha tuku 08:00 dader, arguidu fila hosi Buanurak, arguidu no tuku lezada dala hat iha lezada nia tilun, dala rua iha liman no tuku dala ida iha kanuruk no tebe dala ida iha lezada nia kidan. Kazu ne'e akontese tanba lezada diskunfia arguidu ho feto seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu no artigu 3, 35 (b) Lei Violénsia Doméstika.

Durante julgamentu produsaun ba provas, arguidu hili direitu nonok. Enkuantu lezada deklara katak arguidu baku nia tanba arguidu nervozu ho lezada ne'ebé diskonfia ka dun arguidu hamrik hamutuk ho feto seluk.

Iha nia alegasaun finál, Ministériu Públiku husu ba tribunál atu aplika pena prizaun fulan 6 no suspende ba tinan 1 ba arguidu. Defeza husu atu tribunál aplika pena ne'ebé adekuadu ba arguidu tanba arguidu mak responsavel ba família no arguidu diak malu ona ho lezada no moris hamutuk hanesan feen ho laen.

Depois rona tiha hosi parte sira, tribunál marka fila fali julgamentu ba iha 18 Agostu 2014, tuku 14:00 lorokraik ho agenda desizaun finál.

**36. Kazu krime ofensa ba integridade fízika simples ho natureza violénsia doméstika - Nuc. 0208/13.PDBAU**

Kompozisaun Tribunál : Singulár  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzau : Adia

Iha 29 Jullu 2014, Tribunál Distritál Baucau adia proseus julgamentu ba kazu krime ofensa ba integridade fízika simples ne'ebé komete hosi arguida LS hasoru nia laen. Kazu ne'e akontese iha 07 Agostu 2013, iha Distritu Manatutu.

Tribunál adia prosesu julgamentu ba kazu ne'e tanba testemuña la marka prezensa iha tribunál. Tanba impedimentu ne'e, tribunál marka fila fali prosesu julgamentu liuhosi julgamentu movel iha 27 Agostu 2014, tuku 09:00 dader iha Distritu Manatutu.

**37. Kazu krime ofensa ba integridade fízika simples ho natureza violénsia doméstika-Nu. Prosesu. 271/Crm.S/13.TDB**

Kompozisaun Tribunál : Singulár  
Juis : Dr. Jose Goncalves  
Ministeriu Publiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzauun : Adia

Iha 29 Jullu 2014, Tribunál Distritál Baucau mós adia julgamentu ba kazu krime ofensa ba integridade fízika simples ne'ebé involve arguidu JCG hasoru nia feen. Kazu ne'e akontese iha 24 Maiu 2013, iha Venilale, Distritu Baucau.

Tribunál adia julgamentu ba kazu ne'e tanba lezada la marka prezensa iha tribunál maske tribunál notifika ona. Relasiona ho impedimentu ne'e, tribunál seidak determina loron adiamentu ba prosesu julgamentu kazu ne'e.

**38. Kazu krime ofensa ba integridade fízika simples - Nuc. 0571/14.PDBAU**

Kompozisaun Tribunál : Singulár  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzauun : Adia

Iha 29 Jullu 2014, Tribunál Distritál Baucau halo adiamentu ba kazu krime ofensa ba integridade fízika simples ne'ebé komete hosi NdC hasoru MAdC. Kazu ne'e akontese iha 14 Novembru 2012, iha Buruma, Distritu Baucau.

Tribunál adia prosesu julgamentu ba kazu ida ne'e tanba lezada ne'ebé tribunál notifika ona la marka prezensa iha tribunál. Ba kazu ne'e mós tribunál seidak marka fali agenda julgamentu foin ba kazu ne'e.

**39. Kazu Krime omisídiu agravadu no natureza violénsia doméstika - Nuc. 0041/13.PDBAU**

Kompozisaun Tribunál : Koletivu  
Juis : Dr. Antonio Fonseca, Dr. Afonso Carmona, Dr. Hugo da Cruz Pui

Ministériu Públiku : Dr. Luis Hernanio Rangel da Cruz  
Defeza : Dr. Juvinal Yahanés  
Konkluziun : Sei kontinua prosesu

Iha 30 Jullu 2014, Tribunál Distritál Baucau julga kazu krime omisidiu agravadu ne'ebé involve arguidu JXD hasoru lezada nia feen. Kazu ne'e akontese iha 01 Janeiro 2014 iha Laga, Distritu Baucau.

Ministériu Públiku akuza katak, iha 01 Janeiro 2013, iha tuku 08:00 arguidu kous sira nia oan atu lori ba nia uma, maibé lezada koalia ba arguidu katak labarik seidak haris. Rona lezada koalia hanesan ne'e, arguidu hatun labarik hasai tudik ne'ebé sikat hela iha nia kanotak no sona keda iha lezada nia kabun too te-oan sai. Arguidu kontinua sona dala rua iha lezada nia hirus matan los no karuk. Aktus ne'e rezulta lezada mate keda iha lora akontesimentu iha ospital.

Ministériu Públiku akuza arguidu kontra artigu 138 Kódigu Penál kona-ba omisidiu simples no kontra artigu 139 Kódigu Penal konjuga ho artigu 3, 35 (b) Lei Kontra Violénsia Doméstika.

Iha prosesu julgamentu arguidu konfesa faktus ne'ebé ministériu públiku akuza hasoru nia no arguidu mós deklara katak iha momentu ne'eba nia kous nia oan atu ba nia uma, tanba nia banin feto koalia bebeik katak labarik ne'e la'os arguidu nia oan.

Iha momentu arguidu hakat atu ba derepente lezada mosu hosi kotuk arguidu hanoin nia banin arguidu fila sona keda iha lezada nia kabun no sona dala rua iha hirus matan. Depois sona tiha mak arguidu hakfodak katak sona fali nia feen.

Testamuna MD nu'udar inan hosi lezada depoimentu katak nia hare akontesimentu hosi distansia maizumenus hosi metru 25. Testemuña hare arguidu sona dala tolu iha lezada nia isin no ba mate iha ospital.

Iha alegasaun finál, Ministériu Públiku husu ba tribunál atu aplika tinan 20 ba arguidu. Entretantu defeza husu atu tribunál aplika pena ne'ebé adekua ba nia kliente. Defeza tetu katak arguidu konfesa faktus, laiha antesedente kriminal no arrepende ba ninia hahalok.

Depois rona tiha alegasaun hosi parte sira, tribunál marka fali agenda ba leitura akordaun, iha 21 Agostu 2014, tuku 14:30 lorokraik.

#### **40. Kazu krime partisipasaun iha motin - Nu. Prosesu : 325/Crm.S/13.TDB**

Kompozisaun Tribunál : Singulár

Juis : Dr. Antonio Fonseca  
Ministériu Públiku : Dr. Pascasio de Rosa Alves  
Defeza : Dr. Horta Ramos  
Konkluzau : Sei kontinua prosesu

Iha 31 Jullu 2014, Tribunál Distritál Baucau hala'o julgamentu ba kazu krime partisipasaun iha motin ne'ebé involve arguidu EMCA, VdG, EMCA, MSdA, HB no EMCA iha Eskola Pre-Sekundaria Dilor Lakluta, Distritu Viqueque. Kazu ne'e akontese iha 26 Novembru 2010.

Ministériu Públiku akuza arguidu sira katak iha 26 Novembru 2010, maizumenus iha oras tuku 16:00 estudante finalista sira hosi Eskola Pre-Sekundaria Dilor Lakluta, hamutuk hala'o serimónia despedida iha eskola refere. Iha seremónia ne'e mosu dezintendementu entre estudante sira nune'e mestre iha eskola refere tenta atu rezolve maibé arguidu EMCA ne'ebé involve iha grupu arte marsiais KORK organiza fali nia grupu ba iha eskola. Arguidu sira lori fiska, besi kanu no uza hodi tiru no tuda eskola.

Ministériu públiku akuza arguidu sira kontra artigu 190 (2) Kódigu Penál kona-ba krime partisipasaun iha motin.

Iha prosesu julgamentu arguidu sira deklara katak akuzasaun hosi ministériu públiku los hotu no sira deklara katak katak sira arrepende sira ninia hahalok

Iha alegasaun finál, ministériu públiku husu ba tribunál atu kondena arguidu sira ho pena ne'ebé adekua. Nune'e mós parte defeza, husu ba tribunál atu aplika pena ne'ebé adekua ba arguidu sira tanba arguidu sira konfesa, laiha antesedente krimenal no manifesta sira nia arrendementu.

Depois rona tiha alegasaun ne'e, tribunál marka fila fali julgamentu ba iha 21 Agostu 2014, tuku 15:30 lorokraik ho agenda desizaun finál.

**41. Kazu krime ofensa ba integridade fízika simples ho natureza violénsia doméstika - Nuc. prosesu : 0353/13.PDBAU**

Kompozisaun Tribunál : Singulár  
Juis : Dr. Jose Goncalves  
Ministériu Públiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzau : Kondena ho pena fulan 3 suspende ba tinan 1

Iha 31 Jullu 2014, Tribunál Distritál Baucau prezide leitura sentensa ba kazu krime ofensa ba integridade fízika simples ne'ebé komete hosi arguidu JMC hasoru nia feen. Kazu ne'e akontese iha 11 Jullu 2012, iha Soibada, Distritu Manatuto.

Tribunál prova katak arguidu basa lezada dala rua iha hasan, tuku dala rua iha kabun. Tribunál mós prova katak arguidu foti aipedasuk ida baku tan iha lezada nia liman kabun dala ida.

Makse nune'e depois avalia prosesu hotu, tribunál mos konsodera faktu sira katak arguidu arrepende, laiha antesedente kriminal no diak malu ona ho lezada hanesan feen no laen.

Bazeia faktu hirak ne'e, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

#### **42. Kazu krime explorasaun ba joga ilísitu - Nuc. Prosesu : 0050/12.PDBAU**

Kompozisaun Tribunál : Singulár  
Juis : Dr. Dr. Jose Goncalves  
Ministeriu Publiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzaan : Kondena ho pena multa US\$45,00

Iha 31 Jullu 2014, Tribunál Distritál Baucau prezide julgamentu leitura sentensa ba arguidu Fernando da Costa, João Bosco no Lorenzo Batista Boavida ne'ebé akuzadu involve iha krime explorasaun ba joga ilísitu. Kazu ne'e akontese iha 19 Dezembru 2012, iha Merkadu Vila Nova, Distritu Baucau.

Tribunál prova katak iha 19 Dezembru 2012, arguidu sira sosa meja bola guling ho folin US\$500.00 ho intensaun atu hetan lukru liuhosi joga bola guling.

Iha 20 Dezembru 2012, polísia prende meja refere no detein arguidu sira tanba konsidera katak joga bola guling hanesan jogus ilegal.

Maske nune'e tribunál konsidera faktu atenuantes sira hanesan arguidu sira deklarara arrepende sira ninia hahalok no arguidu sira foin primera-ves komete krime ne'e.

Bazeia ba konsiderasaun hirak ne'e tribunál kondena arguidu na'in tolu ho pena multa US\$45,00 ne'ebé kada arguidu sei selu US\$0,50 durante loron 90. Tribunál mós aplika pena alternativa ba kada arguidu atu kumpri iha prizaun durante loron 60 kuandu arguidu la kumpri pena multa refere.

#### **Atu hetan informasaun kompleitu, favor kontaktu:**

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone: 3323883 | 77295795  
Website: [www.jsmp.tl](http://www.jsmp.tl)  
Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl